



Selasa, 11 April 2023

Ogen:Kuan-Kuanen 24:16



Keke Ngulihi



Asum erlajar maba sepeda mbarenda, lit sekalak si ngatakan maka guling kam sekali lebe maka nggo reh beluhna. Engkai maka arus guling adi banci la guling, ate kami. Kepeken i bas proses erlajar e, la saja kinibeluhen ngkayuhken sepeda, kordinasi antara focus, kecepatan ras keseimbangan e labo serta merta idat. Itambah ka kebiaren kerna guling, ceda sepeda rsd, banci erbanca kacau pikiren. Ncubaken, e ngenca dalanna guna ngeteh seh i ja kapasitasta. Memang i bas pemenanna labo terelakken guling ndai, tapi kenca guling si pemena, nggo eteh nibar ja suina, nggo ka dat pelajaran pertamaengkai maka guling. Alu bage bas percuban si selanjutna nggo lit bekal pemeteh ras mental si terbangun.

Bagi erlajar sepeda ndai ka nge kerna kita nggeluh i bas doni enda. Proses jatuh bangun, gagal-sukses e, labo si dat adi la kita pang encubakenca. Sabap Dibata rembak ras kalak si pang ncubaken ras la mbiar gagal. Kerembaken Tuhan la serta merta njamini maka kegeluhenta bebas arah kiniseran, tapi padan Tuhan man banta si tek baNa ipekena-kenana kegeluhenta amin kai pe si terjadi. Adi kiniseran, percuban ras kendelen ate jadi nandangi kegeluhen kalak si erkemalangen man Tuhan, maka ia minter keke sabap perkuah ate Dibata minter ngangkatkenca. Bagi nina pasmur i bas Masmur 37:23-24 *kalak si ngena ate Tuhan, ikawali dinging itegu-teguNa geluhna. Guling pe ia la mekelek, sabap TUHAN kap si negu tanna.* La lit alasenta la pang erjingkang ncubaken kai si isuruh Tuhan man banta. Mungkin saja kita gagal, tapi kegagalen si pemena labo ujung perjuangenta. Kekeken ngulih, cubakenca, nenlah kegagalen arah kaca mata Tuhan. Sabap kegagalen labo saja ngerana kerna kita si la becus, i bas sisi positif kegagalen ngajarken kita:

Si pemena, gelah kita megermet, lebih teliti. Sipeduaken, reh Buena erlajar ras ndarami teman si banci nampati. Sipeluelken, mbangun relasinta ras kalak sideban. Ras sipentingna, kegagalen ngajari kita tuhu-tuhu mengandalkan Tuhan, maka labo kerina beluh kita ngelayasisa, adi la kin Tuhan si ngajarisa.